

褚人获

堅瓠集



200438

K 200
11:00

丙寅秋日

堅瓠集

補集

八十一翁增祥題

出版说明

《坚瓠集》，清初褚人获撰。

褚人获字稼轩，一字学稼，号石农，长洲（今江苏苏州）人。他在人文荟萃的吴中很有声望，诗文之外，尤熟于明代稗史，著作甚多，以《隋唐演义》和《坚瓠集》最为有名。

《坚瓠集》共十五集，六十六卷，所记范围极广，尤多历代遗闻，明代特详。

现选用民国丙寅（十五年）柏香书屋校印本影印。

坚瓠集（平）四册（清）褚人获撰

浙江人民出版社出版 杭州古籍书店发行

（杭州武林路125号）

（杭州清泰街488号）

江苏邗江珂罗版印刷厂印刷

开本 850×1168 1/32 76印张

1986年8月第一版 1986年第一次印刷

统一书号：11103.170 定价：23元

堅瓠補集序

遂安毛鶴舫先生歸自吳門出褚子稼軒堅瓠全集示余且索余序其補集余受而循覽之歎褚子好學不倦至於如此而留心世道抑何深且篤嗟夫今天下文人不爲少矣其立言著書大約以名心客氣中之故奮其筆舌指瑕索癥甚至古先賢亦在所不免開人心狙詐之端敗風俗陵傲之習不至於畔道離經不止余覽其書不終卷而奮袂長歎以起復繼之以惄然懼愀然悲焉今褚子之宅心也醇厚其立言也和平大要關於名教者凡惓惓加意焉一編之中軼事微詞諛譖浪靡復時時及之不有博奕者乎爲之猶賢乎已亦何損於大雅耶嘗謂明代詩文病在模擬剽竊制藝擅場而外惟叢書爲最以其筆情冷儻有煩上三毛之致余浪游十餘年以客座所聞亦欲筆之成帙而性懶善忘忽忽暮年迄無就緒而益服膺褚子用心之勤也茲補集所載專收有韻之文較之前集爲尤備自茲以往無毫髮之遺憾可云完書獨是余無用於世以稗畦名集而褚子以堅瓠名其書不知余之取稗褚子之名瓠其寄託同異何

如他日過吳門與褚子相遇或有相視而笑莫逆於心者乎歸而訊之毛先生
其亦以余爲知言否錢唐洪昇昉思撰

堅瓠補集卷之一目錄

關社引

募修三清殿疏

吳楚娶婦

琉璃肺

金釵剪燭

代毛延壽解語

曲巷高門行

冷香韻

畫狀元

閨古古

即事成語對

李丐詩

毛序始貓彈鼠文

行樂圖

王勤中題畫

神鬼吟詩

賞菊賈禍

沈山人飛霞

巧對

琪樹

隱焦字詞

承天寺產芝

孝梅

女仙賦詩

雙投橋

蘇長公墨竹

吳氏兒

王古漁

後懷鳥

西湖竹枝詞

容膝齋銘

天香國色

欽天監對

漁陽摻槌

西涯待友

迎月樓春聯

王玉澗降乩

前輩風致

鴛鴦栗子

紫姑賦牡丹

速客詞

女冠還俗

歌妓爲尼還俗

玉真觀女冠

宮人入道

暢道姑

題尼姑

詠雨

婦人投牒

陸放翁

水族加恩簿

驛壁詩

迎海驛壁詩

拄杖

江東三羅

糖擔聖人

糖丞相

甘蔗丞相

李英華

廢書詩

十壽歌

堅瓠補集卷之一

長洲石農褚人穫學稼纂輯

關社引

順治乙酉五月 王師下江南吾蘇帖然順從六月十三忽有湖寇揭竿殺安撫黃家鼐城中鼎沸舉家出避賴大兵繼至得以寧定至八月中始歸廬舍安然人口無傷里中諸君子感關聖覆庇之恩舉會以祀之先府君爲之引曰鬼神如在居高而聽則卑覆載無私作善乃降之福人不可以無家恩莫深於再造維茲六月忽有斬竿揭木之事嗟彼四民盡懷破巢取卵之憂控弦鳴鏑將死以知哀命賤威尊草隕霜而必殺何幸上帝監觀熄自焚之火下民永命回有脚之春男有室而女有家風雨從好寒者衣而飢者食絲粒皆恩帝力高深能生人於旣死民生歡忭在已危而得安爰糾同志用答弘施順時成祭曰祠曰禴曰嘗曰烝迨其吉兮圖像拜颺乃聖乃神乃文乃武如將見之但神立三才聰明正直寧望下土粢醴之報帝錫五福豆登醴酪答以細民飲食之情

然而一誠可格既釁既沐明德馨而黍稷皆馨伏願萬國攸同如幾如式吳民安而天下舉安

募修三清殿疏

先府君有募修白鶴觀三清殿疏文今施捨之喜而勇者選佛場也金布雙林銀函獅座即維摩室中寶座三千可成黃冠挾冊執其裾而告之望望然去矣瞿曇氏曰土木而金碧之丹竈無烟金碧者土木之而後已雖兩聖人不加損益而人情有不當然者予里白鶴觀昔年月鼎祖師飛昇之所也軀三清於廣殿範真武於前楹龍虎交參雷霆在手豈今日茵芝生棟溜雨駁床諸天幾負墻而憂如外腴中槁之人具體慨然寒熱偶侵百病具起頽焉歸於盡而已住持王紹武仰屋而歎蓋歎瓦不胎生木不鬼運道人不生點金之指而藉予數行文墨爲黽勉求之之語作開口告人之人此亦苦心積慮而勢有不得不出於此者也願布金長者慳囊勇破甃之垣之棟宇之閉閤之富者出巨資貧者抖紙角之星銀積斗餘之數粒盡曰檀施是皆燒閒時之香火非暗坐油錢也

獨念此一袖都也風雨漂搖壁陷棖崩亦鄉人之耻也居其鄉者貧莫能助而使他方君子爲之施金度木以成烏革翬飛之絳殿抑又鄉人之耻也噫吾由未免爲鄉人也

吳楚娶婦

七修類藁載吳人娶婦欲長美觀瞻也楚人欲矮善哺傭工也地脈相接而風俗不同吳奢楚儉故致如此王蔭伯戲作娶婦詞云楚人娶婦何喧喧高堂十日排酒筵親戚回頭小姑起傳道新人短而喜低小腰身解哺兒春糧擔水不知疲西家老翁長吳塞吳人娶婦長者愛花燈前引扶入門新人長大媒人尊金馬丁東步搖轉春風裊裊花枝顫可憐吳楚地不同新人長短爲枯榮若使吳人生落楚一生醜惡何其苦乃知長短亦有命不係生身係生土及讀漢書馮勤祖偃長不滿七尺自耻短陋恐子孫似己爲子伉娶長婦伉生勤長八尺三寸仕尙書遷司徒乃知娶婦欲長不特吳人亦非徒美觀瞻已也

琉璃肺

元人咏物詩有琉璃肺題琉璃肺者以豬肺注水拍白如琉璃也王秋潤詩不佳朱望子先生一律云烹調肺品屬卑之拍就琉璃獨出奇紫潤本來如琢石白腴今更類凝脂如霜膚理人應羨似雪中懷獸亦宜常品豪門何足慕祇須作饌供期頤

金釵剪燭

蒼書叔金釵剪燭詩絳臺流蠟暈生花剪剔須教映碧紗夜靜已無刀尺響惟殘纔挂掠梳斜玉蟲綴處紅脂落金錯拈來鳳尾叉最是侍兒能護惜燼煤恐澆髻如鴉朱望子先生詩良夜華堂列綺筵美人侍立態嫵娟爲嫌遠照昏繁上特拔斜簪出髻邊紅蠟一枝沾綠膩黃金雙股帶青烟當時韵事羣歡笑遂共題詩擘絳箋

代毛延壽解語

唐文粹載程晏設爲毛延壽自解語云帝見王嬙美召延壽責之曰汝何欺我之甚也延壽曰臣以爲宮中之美者可以亂人之國臣欲宮中之美者遷於虜

庭是臣使亂國之物不逞於漢而移於胡也昔閔夭獻美女於紂而免西伯齊遺女樂於魯而孔子行秦遺女樂於戎而間由余是豈曰選其惡者遺之美者留之耶陛下以爲美者是能亂陛下之德也臣欲去之將靜我而亂彼陛下不以爲美者是不能亂陛下之德也安能亂彼謀哉臣聞太上無亂其次去亂其次遷亂今國家不能無亂陛下不能去亂臣爲陛下遷亂耳惡可以爲美爲彼得乎帝不能省君子曰良畫工也孰誣其貨哉

曲巷高門行

順治初周宗之者長洲猾吏暴橫一時直指張愼學訪拿杖斃大快人意門上春聯書曲巷幽人宅高門大士家句胡瀚翁作歌云城南曲巷宗之宅大士高門自標額華堂麗宇初構成粉壁磨磚淨如拭側聞其內加精妍洞房綺疏屈曲連朝恩室中魚藻洞格天閣上簇花璫百凡器皿皆精絕花梨梓椅來滇粵錦帳一床六十金他物稱是何須說前列優俳後羅綺食客平原無愧矣勢能炙手氣薰天忘却由來吏委瑣嗟嗟小吏何能爲泥沙漏卮安從來考課不明

銓選維前後作令皆驚駭錢穀訴獄惜無識上下其手聽出入哆口嚼民如寇
讎官取其十吏取百滿堂知縣人閔傳宗之相公閣老權片言能合宰公意隻
字可發官帑錢塗脂霧膏曾未已御史風雷申法紀窓戶青黃猶帶濕主人骨
肉飛紅雨廷中呼暴漸無聞室內丁丁纔往聲斥賣屋居償帑值兩妻削髮投
空門人言宅兆凶有由前傷沈胥今損周驟然興廢同一輒官府估價何人酬
吾謂此言猶耳食人凶宅兆何由吉鞭撻民髓供藻飾築愁府怨居安得伏闕
難留直指公長懸秦鏡照吳中神奸斂跡吏道肅比屋城南盡可封曲巷之宅
誰云凶

冷香韻

小窓清紀和冷香韻句幽人到處烟霞冷仙子來時雲雨香霜封夜瓦鴛鴦冷
花拂春簾翡翠香粧臨水鏡花俱冷曲奏霓裳月亦香雪霰層巒山骨冷花隨
飛浪水痕香夷光出浦輕紗冷洛妃淩波羅襪香

畫狀元

江夏吳小仙

傳

字魯夫一字次翁幼寓金陵工山水人物薦入仁智殿供奉孝

廟賜畫狀元印

宣一廟作

一日飲友人家酒闌請作畫小仙將蓮房濡墨印紙上數

處皆莫測其意少頃縱筆揮洒成捕蟹圖最爲神妙

金陵李潛夫著號墨湖

學畫於沈啟南學成更倣次翁造其堂奧謝子象

承學

題其畫云銀河無路泛

仙槎一舸空江此是家殘月照人秋睡穩不知清夢在蘆花

閻復古

崇禎庚午孝廉徐州閻爾梅字用卿又字古古恃才倣脫交游不輕許可遇溧

陽陳百史

名夏

於虎丘獨許其必發巍科癸未果以會元榜眼及第鼎革後百

史入內閣在漢人中最用事古古奔走於外當事物色之禍將及乃入都與百

史相聞一日百史令親信至閻寓謂如肯會試當以會元相贈古古笑而不答

其人屢促回晉古古令伸掌書一嚇字於上云以此復之蓋以鴟梟得腐鼠喻

陳而以鴟雛自喻也其詩有誰無生死終難必各有行藏兩不如亦上百史句

也百史見之不敢復言

卽事成語對

夷堅志汪仲嘉謫南康嘗招郡僚宴集營妓咸至有姓楊及李者色藝頗佳理
椽主李戶椽主楊席間時相嘲戲理椽顧謂戶曰爾愛其羊楊我愛其禮李載
之魯論無相笑也衆大笑而求所以爲對者時敖用卿樂與汪對奕麋爭劫思
行星子沈令從傍帖囑汪曰我已有對矣傍觀者審沈當局者迷樂衆擊節歎
賞

李丐詩

毛鶴舫先生際可有李丐傳丐江西人往來江漢三十餘年遇紙筆卽書字如
符籙皆不知其爲詩先生始物色得之附錄二十餘首詩似深山高衲不與佯
狂玩世者比其詩云瀑泉今古說廬台須向雲居絕頂來潭逼五龍時怒吼勢
摧三峽更喧豗橫奔月窟千堆雪倒瀉銀河萬道雷鎖斷鷗峰懸白練遙看蛛
網掛層臺 激灩湖光數頃浮誰知曲湧萬峰頭豁開古殿當前月散作空山
不盡流金壁影搖冰鏡裏魚龍深在廣寒秋一輪直接曹溪路白浪家風遍太

洲 何年鞭月架長虹碧落無門却許通曾是御風人去後故留鳥道礙虛空

山色溪光明祖意鳥啼花笑語機緣有時獨坐臺盤上午夜無雲月一天

毛序始貓彈鼠文

臣貓言臣以賁皇之同姓爲章惇之後身蒙被私恩獲居禁近鼾睡臥榻之側獨肯見容高踞華屋之巔初不爲怪甚且引登席上援置臺中食必分肥坐或加膝搏擊斃能言之鳥竟免詆訶盤旋亂將覆之碁輒承嘉悅凡諸異數超越同儕臣何敢辭口舌之勞致有負爪牙之任故常效張湯之磔不欲如義府之柔務俾么麼之黨類盡除方保公家之器物無損豈彼自矜五技訖持兩端嘖嘖者不厭煩訛訛焉且惑聽臣請暴其鬼蜮之狀絕此侏儻之聲謹按搜粟都尉兼掠剽使襲封同穴侯鼠子本係小醜之尤冒稱諸蟲之老於辰支雖居首在物類爲最微賦形既消沮不颺稟性復狡獪莫比光天化日之下暫爾潛踪暗室屋漏之中公然逞惡營窟穴以藏匿時爲兔脫之謀畏首尾而伏行更甚狗偷之態漫云有體誰謂無牙速訟遂已穿墉鑽隙何曾忘壁甚至傷犧牛之